

## Jesúsnoa Yoikĩ Fětsa Hebreofo Kirika Kenexõ Fomani

*Jesús afe Apaõxõ yoini. Nāskakē nō tāpitiro afe keskaramāki*

<sup>1</sup> Efe yora mīshtichi, ẽ mato kirika kenexõ fo-  
mai mā tāpinõ Jesúsnoa. Taeyoi Epa Niospa afe  
meka nõko xinifo israelifo yoipaoni mēxotaima.  
Afe ājiriõnoa ato yoipaoni. Askatari afe namapa  
ato yoipaoni. Askatari afe meka yoimisfoxõ ato  
yoipaoni. <sup>2</sup> Akka iskaratĩa noko yoia afe Fakeoxõ.  
Nāskakē nō tāpitiro Nios afe keskaramāki. Afe  
Fakeoxõ keyokõi nai mēranoafoya mai anoafoyari  
onifani. Nāskafata afe Fake katonni nai mēranoafoya  
mai anoafoyari nõko xanĩfo finakõia inõ. <sup>3</sup> Nāfi  
sharafinakõiaiki Apa Nios keskarakõi. Apa Nios  
afe keskaramāki noko õimani. Nāato keyokõi kexe-  
sharamis afe mekasharaõxõ. Askatari nokoõnoax  
nani nõko chaka noko soaxoxiki a keskara shara  
noko õi. Nāskakē nõko chaka anā shināima. Nāskata  
mā otoax nai mēra kani Apa fe xanĩfokõi ixiki.

*Niospa afe ājirifo Jesús ato finõkõia*

<sup>4</sup> Nāskakē nō tāpitiro Niospa Fāke ājirifo ato  
finõkõia. Nāskax Niospa Fake xanĩfokõi Jesús.  
<sup>5</sup> Akka Niospakai afe ājirifo yoikĩ iskafamisma:

Māfi ẽfe Fakekõifokĩ. Ẽ māto Epaki,  
ato famisma. Akka afe Fake fisti yoikĩ iskafani:

Mĩ ẽfe Fakekõi. Nāskakē mĩ fisti āto xanĩfo  
finakõia ipanakaki,

ixõ yoini. <sup>6</sup> Nãskaxõ ãfe Fakekõi mai ano nĩchini. Nãskata ãfe ãjirifo yoini iskafakĩ:

Keyokõiichi ěfe Fake noikõikãfe. “Mĩ fãsi sharakõi,”

ixõ yoikãfe. <sup>7</sup> Nãskata ãfe ãjirifoõnoa yoikĩ iskafani:

Ěfe ãjirifo oa nefe koshi katiro keskara ě fai, ěfe meka yoinõfo. Nãfori oa chii xoisai keskarafo. Nãskakẽ nã ě ato yoiai keskafakĩ afara arisafatirofo,

ixõ Niospa yoini. <sup>8</sup> Akka afianã ãfe Fakeõnoa yoikĩ iskafani:

Mĩ ea keskarari. Mĩri mĩ Nioskõi. Mĩ ãto xanĩfokõi ipanaka. Mĩ keyokõi ĩkikõisharapakenaka. <sup>9</sup> Mĩ afara sharafo noikõimis, nã afara chakafo noikaspayanã. Nãskakẽ ě mia katonĩ mĩ ãto xanĩfo inõ. Akka ãjirifo ě ato inimamai. Akka ě mia inimamakõi,

ixõ yoini. <sup>10</sup> Askata anã yoini,

Mĩri ea keskarakõi. Mĩ ãto xanĩfokõi. Afaa oniyamataĩ mai yafĩ nai mĩ onifakĩ taefani.

<sup>11</sup> Nãskakẽ nãfo keyokõi mitokomexii. Akka mĩ fisti keyonakama. Nã rapati mã chapoax keyotiro keskai mai fe nai keyoxii. <sup>12</sup> Rapati chapokẽ potatirofo fetsa fena shara fixikakĩ. Nãskarifiakĩ mai fe nai anã sharakẽma mĩ anã mai yafĩ nai pãofakĩ keyotiro. Anã fenashara faxiki fenashara inõfo. Akka mĩ fetsatiroma. Mĩ fisti ipanaka,

ixõ Epa Niospa ãfe Fake yoini. <sup>13</sup> Niospakai ãfe ãjirifo yoikĩ iskafamisma:

Mã efe xanĩfo ikikai efe ketaxamei. Tsaokãfe, ixokai yoimisma. Akka ãfe Fake fisti yoini iskafakĩ:

Mĩ efe xanĩfokõi ikano nã mia noikaspaifãfe

anã mia afeska fatirofoma mĩmãĩ keyokõĩ ato ikikẽ. Nã mia noikaspaifo mĩ ato ikĩxii, ẽ mia askafaino mĩ efe xanĩfokõĩ ixii, ixõ yoini. <sup>14</sup> Akka Epa Niospa әне ăjirifo yoini noko kexesharanõfo. Fatorafãferi Jesús Ifofaafomãkĩ afe ipaxakakĩ. Nãskakẽ Niospa әне ăjirifo yoini a Ifofaafõ kexesharanõfo. Nãskakẽ nõ tâpia ăjirifo Jesús finõkõia.

## 2

*Jesús nokoõnoax nanixakĩ noko imapakenakakĩ. Nãskakẽ kachikiri fayamakãfe*

<sup>1</sup> Akka Cristo ăjirifo finõkõia. Nãskakẽ nã meka chanĩmakõĩ Niospa Fakeõnoa nõ nikasharakõitiro, na meka shara kachikiri fayamaxiki. <sup>2</sup> Niospa әне ăjirifo nĩchini әне meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani. <sup>3</sup> Akka taefakĩ Jesús yoiyoni nokoõnoax chipo naxiai, nõko chaka noko soaxoxiki nõ afe ipaxanõ. Nãnori ato yoiaito nikakaxõ a afe rafemisfãfe noko yoinifo. Akka nõ Jesús Ifofaino, Niospa noko ifitiro. Akka nõ nikayamaino Niospa noko ifitiro. <sup>4</sup> Askatari Niospa afara fetsa fetsatapafõ tsõa atiroma keskara ato ispapaoni aõxõ tâpinõfo әне meka chanĩmakõikẽ. Askatari әне Yõshi Shara ato mẽra naneni ato katõxõ nãfãfe yonokĩ fetsa fetsafakĩ yonoxonõfo. Nãskakẽ nõ Niospa meka chanĩmara fai.

*Jesucristo nono mai anoax yorakõĩ ikiyoi oni, feronãfakekõĩ askafiax Nioskõĩ*

<sup>5</sup> Akka Niospa áfe ájirifo yoikĩ iskafanima: “Na mai fena anoax mã xanĩfo ixii,” ixõ yoinima. (Nãskakẽ nõ Jesúsnoa nõ shinãmakitiroma nãmã xanĩfofinakõikẽ.) <sup>6</sup> Akka na kirika kenekĩ David yoikĩ iskafani Niospa shinãmanaino:

Epa Niosi, keyokõi mĩ onifani. Akka nõkai afama. Nãskafekẽ mĩ noko noiyanã mĩ noko shinãmis, noko kexesharayanã. <sup>7-8</sup> Akka mĩ ájirifãfe noko finõyonifo. Nãskafiano nono mai anoa mĩ noko xanĩfo ima. Nãskakẽ nã mĩ onifanifãfe noko nikakõitirofo mĩmãi noko xanĩfo imasharakẽ,

ixõ keneni. Akka keyokõi nã Niospa onifanifo nõ áto xanĩfo itiro. Tsoa fetsakai xanĩfo itiro. Askafiano keyokõichi noko nikakanima. <sup>9</sup> Akka mã nõ tãpia Niospa noko noikĩ nono mai ano Jesús nĩchini yorakõi inõ. Nãskakẽ áfe ájirifãfe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramãi Niospa fichipaikĩ keyokõi noko noikĩ. <sup>10</sup> Epa Niospa keyokõi onifani aõnoax keyokõi inõfo. Nãskakẽ áfe fakefo afe isharapakenakafo. Nãskaxõ áfe Fake Jesús nĩchini nokoõnoax omiskõiyonõ nõ afe ãpaxanõ. Áfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ipaxatiro. <sup>11</sup> Akka Jesús áfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafõ efe fakefo,” ixõ noko yoitiro. <sup>12</sup> Nã chanĩmara faafoõnoa Jesús Apa Nios yoikĩ iskafani:

Epa Niosi, mĩõnoa efe yorafo ã yoisharaxii. Nãskakẽ ato fe mĩõnoax ã fanãixii,

ixõ yoini. <sup>13</sup> Nãskaxõ anã yoikĩ iskafani:

Epa Niosi, ẽ mia chanĩmara faaki,

ixõ yoini. Nãskafata anã yoikĩ iskafani:

Epa Niosi, nã ea chanĩmara faafo mã mĩ ea inã  
ẽfe fakefo inõfo,

ixõ Jesús Apa Nios yoini. Nãskarakõi keneni David.

<sup>14</sup> Nã fakefo apa fistichi ato fake fafiano nã yora fistiyata nã imi fistiya ikafo tsoa osiama. Nãskarifiai Jesústri noko keskara yorakõi ipaoni. Yorakõi kãnixakĩ noko nãxonni Satanás yõshi chaka nõko ifo iyamanõ anã noko namapakenõma. Nokoõnoax Jesús naitĩa Satanás ẽfe kerex xateni anã noko afeska faxima. <sup>15</sup> Akka Jesús nokoõnoax nayoamano yorafo nõ naira ikax ratekõipaonifo. Askafiano mã nokoõnoax Jesús naxõ noko chaka soaxona afe ìpaxanõfo. Nãskakẽ napai nõ anã ratetiroma. <sup>16</sup> Akka mã nõ tãpia Jesúskai onima ẽfe ẽjirifo afara ato axoyoi. Askatamaroko Abraham ẽfe fenafo nã chanĩmara faafo, Abraham chanĩmara fapaoni keskafakĩ chanĩmara faifono ato afara axosharayoi oni. <sup>17</sup> Akka Jesús noko keskara yorakõi ini. Nãskakẽ nã nõ meemis keskarari arifi meepaoni. Yorafãfe noikaspaifono meepaoni paekõi. Askatari mekafaifono, askatari chakafamapaiyaifono, meepaoni paekõi. Nãskakẽ nokoõnoa shinãi. Noko potaxikima. Nãskakẽ Epa Nios noko kifixomis noko imasharanõ. Akka nã Jesús nokoõnoax nani nõko chaka noko soaxoxiki. Nãskakẽ noko Apa Nios kifixotiro iskafakĩ: “Epa Niosi, ẽ ato nãxonikĩ ato chaka soaxõfe nã ea chanĩmara faifo,” ixõ Apa yoitiro. Nãskaxõ noko Epa Nios kifixomis xanĩfokõi itiro. <sup>18</sup> Satanás Jesús chakafamapaini. Akka Jesús omiskõifikĩ

afaa chakafanima. Nāskakē nokori Satanás afara chakafamapaiyaito Jesús noko axosharatiro nō afaa chakafayamanō.

### 3

#### *Jesús Moisés finōkōia*

<sup>1</sup> Efe yora mīshtichi, Epa Niospa mato katonī āfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesús ato finōkōia. Nāskakē Jesús shināsharakōikāfe. <sup>2</sup> Akka a Niospa Jesús yoini keskara, nāskara asharakōini. Nāskatari Niospa Moisés katonī israelifo Egipto mai anoa ato ifinō, askatari āfe meka shara ato yoinō. Nā Niospa yoini keskarari Moisés asharakōini. <sup>3</sup> Akka Moisésnoa yoisharafitirofono, askatamaroko Jesúsnoa yoisharakōitirofo. Nā peXe sharaōnoa yoisharatirofono, askatamaroko nā peXe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoikī finasharakōitirofo. <sup>4</sup> Āa peXe itiroma. Akka nā peXe famisto atiro pexesharafakī. Nāskarifiakī Epa Niospa keyokōi onifani. <sup>5</sup> Akka Moisés Epa Niospa āfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharpaoni. Askatari Egipto anoa ato ifixō ato iyoni. Nā Moisés apaoni keskafakī ōikī keyokōichi tāpikōitirofo Epa Niospa āfe Fake nīchiai afe yorafo ichapakōi ifinō nai mēra afe ĩpaxanōfo. <sup>6</sup> Akka Jesúskaī Epa Niospa āfe yonomatima. Āfe Fakekōi. Nāskakē afe yorafāfe

ãto Ifokõi. Akka tsoamãki afe yorafo ã mato yoinõ. Nõ Jesús Ifofaxõ a noko yoiyoni keskakafã nõ manasharai nã anã oaitã, nõ kachikiri fayamax nõ afe yorakõi nõ iki.

*Niospa fakefo aõnoax inimakõitirofo anã ãto õiti fekaxtenõma*

<sup>7-8</sup> Akka Niospa Yõshi Sharapa yoikĩ iskafani:

Epa Niospa mato yoiyai keskakafã nikasharakãfe. Mãto õiti kerexfayamakãfe Niospa meka nikakaspakĩ. Mãto xinifo keskara iyamakãfe. Mãto xinifo ã ifini Egipto anoa. Ë ato ififinino tsõa istoma anoxõ ea nikasharanifoma. Askakimaroko Jesús mato yoiyai keskara nikasharakõikãfe. <sup>9</sup> Nã tsõa istoma anoxõ mãto xinifãfe ea nikakaspapaonifo nã tsõa õiyomisma ãfe yonoshara ã ato ispafiaino. Ano afaamano a piaifo ã ato inãpaoni. Askatari ano fakamano, ã ato inãpaoni. Ë ato xinia ranã askafafiaino ea nikakaspapaonifo. <sup>10</sup> Nãskakẽ ã atoki õitifishkini. Nãskakẽ ã yoini iskafakĩ: “Ea nikatamaroko ãto õiti mẽraxõ afara chaka shinãmisfo. A ã ato shinãmapaiyai keskarakai tsõa nikafoma.”

<sup>11</sup> Nãskakẽ ã atoki õitifishkikĩ ã atoõnoa yoini iskafakĩ: “Na israelifãfe ea nikakaspakani. Nãskakẽ a ã ato inimamapaiyai keskakafã ã ato axopakenakama,”

ixõ Epa Niospa nõko xinifoõnoa yoini.

<sup>12</sup> Efe yora mĩshtichi, õisharakãfe. Nõko xinifo keskara iyamakãfe. Mãto shinã mẽraxõ mã Jesús chanĩmara fayamax chakakõi mã itiro. Mã askaikai nã Nios nĩpanakãfe mã ipanakama.

<sup>13</sup> Askatamaroko pena tii yoinõnãsharakĩ inimama

faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe. <sup>14</sup> Akka nō taefakī Jesús chanīmara fakōini keskafakī eneyamax nō afe ipaxatiro. <sup>15</sup> Akka nā kirika keneano iskakī ē mato yoinō,

Epa Niospa mato yoiyai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

<sup>16</sup> Akka, ¿tsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyoni. Nāfāfe Nios nikakaspapaonifo. <sup>17</sup> Akka, ¿tsoafoki Epa Nios ōitifishkinimē cuarenta xinia mā akax? Nā nikakaspayanā afara chakafaifoki ini. Nāskakē Epa Niospa tsōa istoma anoxō keyokōi ato namapakeni. <sup>18</sup> Akka, ¿tsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospafo ato yoikī askafani. <sup>19</sup> Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

## 4

<sup>1</sup> Akka Epa Niospa noko yoiyai iskafakī: “Mā ea Ifofaino ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe.



<sup>2</sup> Epa Niospa noko yoia: “Ē mato ifipai,” noko fani. Nāskarifikā Epa Niospa nōko xinifo yoikī iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini. <sup>3</sup> Akka Niospa Moisés shināmanaino iskafakī kirikaki kenekī yoini:

Ea nikayamaifono ě atoki ōitifishkikī. Nāskakē ě ato fāsikōi yoia iskafakī: “Mā ea nikayamaino ě mato mai shara fetsa ano imapakenakama anoax mā isharanō,”

ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyamanōfo. Iskaratīari afe yorafo isharamapai afe isharapakexanōfo. Akka nōa nō Nios chanīmara faino, Epa Niospa noko ifisharai nō inimapakexanōfo. <sup>4</sup> Akka kirikaki Moisés keneni pena tenetiōnoa yoikī. Iskafakī keneni:

Seis nia yonokī Epa Niospa keyokōi onifani.

Nāskaxō pena fisti teneni, ixō keneni. <sup>5</sup> Askatari anā kirikaki keneni, iskafakī yoikī:

Efe isharapakenakafoma, ixō kirikaki kenekī yoini.

<sup>6</sup> Askafiano ranāri afe isharapakenakafo. Akka nā Niospa meka nikakaspai fo afe ipanakafoma. <sup>7</sup> Nāskakē Niospa shināmanainori chipo David kirika kenekī yoini iskafakī:

Iskaratīa Niospa meka nikakī mātō shināmā shināsharakāfe. Anorima shinākakima, ixō David yoini.

<sup>8</sup> Mā Moisés naano, Josué israelifo iyoni Canaán mai ano isharanōfo. Nāskaifono Niospa iskafakī yoini: “Nā ea Ifofaafo efe nai mēra isharapak-enakafo,” ixō yoini. <sup>9</sup> Nāskakē mā nō tāpia nō Ifofaax, nō afe isharapakenaka. Epa Niospa afe yorafo inimamasharapai isharapakexanōfo. <sup>10</sup> Epa Niospa keyokōi onifaxō inimayanā teneni. Nāskarifiai nō Epa Nios ano kaax a nō iyopaoni keskara nō anā itiroma, Niospa noko inima-masharakōiaino. <sup>11</sup> Akka fekaxfiano nō Nios Ifofakōitiro afe isharapakexakī. Akka nōko xinifāfe nikayamaito Epa Niospa ato mai shara ināpaifikī ato inānima. Nāskakē nōri ato keskara ipaima.

<sup>12</sup> Epa Nios nipanaka. Nāskarifiai āfe meka keyonakama, mitsisipakōi. Akka keno ikikōichi nami potexō āfe xaki mēra nō ōitiro. Nāskarifiai Epa Niospa meka fāsi finakōia. Āfe meka shara nō mēra ikano aōxō nō tāpitiro nō shara ikamāki askayamai nō chakamāki. <sup>13</sup> Epa Niospa keyokōi tāpia nō ōtatiroma. A nō afara shināxō nō amis keskara keyokōi tāpikōia. Akka nōri tāpia a nō amis keskara. Nāskakē nō Nios pāratiro.

### *A Nios ato kīfixomisfo Jesús ato finōkōia*

<sup>14</sup> Akka Jesúsfi Niospa Fakekī. Askatari noko Nios kīfixomis. Nāatofi a Nios ato kīfixomisfo finōkōiaki. Nāskax nai mēra Nios ano kani. Nāskakē nō kachikiri fatiroma nikakōisharayanā. <sup>15</sup> Nāatori meemis a Satanás noko afara chakafamapaiyai keskara. Nāskakē nāato tāpia a nō meemis keskara fekaxkōi. Akka Satanás Jesúsri afara chakafamapaini. Nāskafekē Jesús nikanima. Nāskakē nokori axotiro. <sup>16</sup> Nāskakē nō Nioski ranokima nā nō

yoipaiyai keskara nõ yoitiro. Nõ yoiaito Niospa noko noikĩ noko afara axosharatiro.

## 5

<sup>1</sup> Ë mato yoinõ afeskax ato Nios kĩfixomis xanĩfo itirofomãki. Nã Niospa ato katoato nãato noko kĩfixonõ. Nã Niospa katoa noko keskara yorari itiro. Nãfi Nios noko kĩfixomis xanĩfo itiro. Nãskakẽ yorafãfe Epa Nios aicho fakakĩ a Nios ato kĩfixomisto ãfe xanĩfo afara inãmis atori Nios inãnõ. Askatari yorafãfe ãto chaka soapaikakĩ nã yoinã ina fexomisfo retexõ ato koofaxonõ Epa Niospa ãto chaka ato soaxonõ. <sup>2</sup> Akka nãri noko keskarari nãatoro afara chakafatiro. Nãskakẽ tsõa tãpisharayamakĩ, shinãsharakima afara chakafaino, nã xanĩfãfe tanaima isharaxõ ato axosharatiro. <sup>3</sup> Nãskaxõ yorafãfe nã yoinã inafõ inãino nãato retexõ koofakĩ Epa Nios ato kĩfixomis Epa Niospa ãto chaka ato soaxonõ. Nãskatari ãri ãfe yoinã ina retexõ koofamis ari Epa Niospa chaka soaxonõ, a noko axomis keskafakĩ. <sup>4</sup> Akka ãkai tsoa katometiroma Nios ato kĩfixomis xanĩfo ixii. Nios fistichi ato katotiro Aarón ani keskafakĩ. <sup>5</sup> Nãskarifiai Cristo aari katomenima Nios ato kĩfixomis xanĩfokõi ixiki. Akka Apa Nios fistichi yoini iskafakĩ:

Mĩ ãfe Fakekõi. Nãskakẽ mũ fisti ãto xanĩfo finakõia ipanakaki, ixõ yoini. <sup>6</sup> Askatari anã iskafakĩ yoini:

Mĩfi ato Nios kĩfixomis xanĩfo ipanakaki, nã xanĩfo Melquisedec ipaoni keskara, ixõ Apa yoini.

<sup>7</sup> Jesús nono mai ano ikax, mã chaima naxiki omiskõikõini. Nãskaxõ fãsikõi mekayanã oiayanã

Apa kīfini iskafakī: “Epa, mī keyokōi tāpia. Ea mīa ifipaikī ea mīa ifitiro ẽ nanōma,” ixō yoini. Mēxotaima nā Āpa amapaiyai keskara fisti shinākī Jesús āfe Apa nikakōini. Nāskakē āfe Āpa tenemakōini axosharakōiyanā omiskōiaino. <sup>8</sup> Akka Jesús Niospa Fakekōifiax omiskōini. Omiskōifikī Apa nikakōini. <sup>9</sup> Nokoōnoax omiskōifikī Apa Niospa yoiyai keskara nikakōini. Nāskaxō a nikaifo ato ifipakexakī. Nāskax noko ifimis sharakōi imis. <sup>10</sup> Epa Niospa āfe Fake Jesús katoxō yoikī iskafani: “Mīfi nā Melquisedec keskara ikikai. Nāskakē a ea ato kīfixomisfāfe āto xanīfokōi mī ipanakaki ato ĩkipakexakī. Nāskaxō a eōnoa ato kīfixomisfo xanīfofori mī ato finōkōinīfofānakī,” ixō Āpa yoini.

*Ōisharakōikāfe. Mā Jesús kachikiri faa fāsi mesekōi itiroki*

<sup>11</sup> Ẽ mato yoia Epa Niospa Jesús katoa a noko Nios kīfixomis afe xanīfo finakōia ixii. Akka nāōnoa ẽ mato fetsa yoisharapai. Nāskakē ẽ mato anā yoisharatiroma māmāi fenāmāshta tāpiaino. <sup>12-13</sup> Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka māakai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī. <sup>14</sup> Akka nō pena tii Niospa meka ōifafāikī nō tāpikōiax isharakōitiro māmāi nō tāpiax fato sharamāki, fatofori chakamāki.

## 6

<sup>1</sup> Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyanā nōko chaka shināmakitiro. Nāskaxō nō Nios Ifofaino noko chaka soaxotiro nō afe ĩpaxanō. <sup>2</sup> Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia. <sup>3</sup> Nāskakē a Niospa fichipaiyaino afara fetsafori nō tāpitiro.

<sup>4</sup> Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki. <sup>5</sup> Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō. <sup>6</sup> Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma. <sup>7</sup> Akka ē mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino. <sup>8</sup> Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka

shara nikafafãifikĩ Nios chakafakĩ mekafaito nã keskarafõ Niospa nã omiskõipakenakafo mēra potaxii. Nõ tare shara keskarakē Ēpa Nios nokoki inimatiro. Akka nõ tare chaka keskarakē Ēpa Nios nokoki inimatiro. Nãskakē noko omiskõimaxii.

*Akka mã nõ tâpia nõ Jesús chanĩmara faax nõ isharakõitiro*

<sup>9</sup> Efe yora mĩshtichi, mẽ matoõnoa tâpisharakõia. Mãkai ato keskarama. Akka Jesús Ifofaax oa mã fãi kai keskara mã Nios ari kai. <sup>10</sup> Akka Ēpa Nios sharakõi. Afaa chaka shinãmisma. A mã sharafamis Ēpa Niospa tâpia, shinãmakima. Askatari mã Nios noikĩ a chanĩmara famisfõ mã ato axosharamis. Nãskakē Ēpa Nios shinãmakima. <sup>11</sup> Akka Ēpa Nios kachikiri faxoma a mã akai keskararifakĩ, ato sharafakĩ mẽxotaima Ifofasharakõikãfe, “Nioski nokoaitĩa nõ afe isharapakexakĩ,” shinãkõikĩ. <sup>12</sup> Akka Ēpa Niospa meka shinãmakiyamakãfe. Ēpa Niospa fetsafo yoini iskafakĩ: “Mã ea Ifofakĩ mã ea manasharaito ě mato afara shara inãxii,” ixõ ato yoini. Nãskarifiakĩ mãri manasharakãfe, Jesús kachikiri faxoma. Mãri afara shara fixikakĩ.

<sup>13-14</sup> Niospa nõko xini Abraham yoiyoni iskafaki: “Ēkĩa mĩ Nios. Ea tsõa finõtiroma. Ramashara ě chanĩmisma. Ē mia yoinõ mĩ tâpisharakõinõ. Ē mia axosharakõikai mĩ fenafo ichapakõi inõfo. Akka mĩkai ato tanãtiroma mĩ fenafo mãi ichapakõikē,” ixõ Niospa Abraham yoiyoni. <sup>15</sup> Nãskakē Abraham fena fenakima manakõipaoni. Nã Niospa yoiyoni keskarakõi fakĩ Abraham ãfinĩ fake fini. Āfe fake Isaaca. <sup>16</sup> Akka fẽtsa noko yoikĩ iskafatiro: “Ē mia pãraima ěfe xanĩfãfe mã ea õi. Nãskakē

nã ã mia yoiai keskara ã mia axoxii,” ixõ noko yoitiro. Nãskakẽ nõ tãpitiro nokokairoko pãraito. <sup>17</sup> Nãskarifiakĩ Niospa noko tãpimapai ãfe meka chanĩmakõi. A noko yoiyoni keskara afeskaxõ anã fetsafatiroma. Nãskaxõ ato yoini iskafakĩ: “Ë Nioskõi. Tsõakai ea finõtiroma. Nãskakẽ nã ã mato yoiai keskafakĩ mã ea chanĩmara fatiro,” ixõ ato yoini chanĩmara fanõfo. <sup>18</sup> Chanĩma Niospa a noko yoiyoni keskara mã noko õimasharakõia mã nõ tãpia. Nãskakẽ noko pãratiroma. Noko yoini iskafakĩ: “Ëfe Fake ã matoki nĩchixii mãto chaka mato soaxonõ mã efe ãpaxanõ,” ixõ noko yoini. Nãskakẽ nõ chanĩmara fai nã noko yoiyoni keskara ãfe Fakeõnoax Epa Nios ano nõ afe ipaxatiro. <sup>19</sup> Nãskaxõ anã afaa fetsa nõ shinãtiroma. Nios makinoakai tsõa noko potatiroma. Nãskakẽ Epa Nios fe nõ ipanaka. <sup>20</sup> Jesús nai mẽra kani nõ aõnoax chipo kanõ. Nãrixõ xanĩfokõixõ noko Apa Nios kĩfixõfafãini Melquisedec ipaoni keskaraxõ.

## 7

### *Nã Melquisedec yorafo Nios kĩfixomis ipaoni*

<sup>1</sup> Akka Melquisedecnoa ã mato yoinõ afe keskara ipaonimãki. Melquisedec xanĩfo ipaoni pexe rasi ãfe ane Salem anoax. Askatari ato Nios kĩfixomis ipaoni. Nã cuatro xanĩfofo yometso chakafo ato ãchoxõ Abraham ãfe pia ifitani, afama mĩshtifoya oaino, nã Melquisedec Abrahamki nokoni. Nãskata Melquisedec Abraham Nios kĩfixoni axosharanõ. <sup>2</sup> Askafaito õikĩ Abraham Melquisedec nã afama mĩshti fitanai ranãri inãni. Nã Melquisedec ãfe ane “Asharakõimis,” famisfo. Nã Salem pexe rasi anoax xanĩfo ipaoni. Nã Salem

ãfe ane “Isharakõi,” fapaonifo. <sup>3</sup> Nã Melquisedec ãfe epa yafi ãfe efa nõ tâpiama. ãfe xiniforikai nõ tâpiama. Askatari nõ tâpiama a fake kãinitĩa. A nanitĩari nõ tâpiama. Nãskakẽ nõ Melquisedec shinãkĩ Niospa Fakeri nõ shinãtiro. Nãato noko Niosnoa kĩfixomis xanĩfo ipanaka.

<sup>4</sup> Efe yora mĩshtichi, shinãkapo. Melquisedec xanĩfokõi ipaoni tsoa keskarama. Akka Abraham israelifãfe taefenai ãto xini iyopaoni. Abraham sharakõi ipaoni. Askafixõ Abraham Melquisedec afama mĩshti inãni ãfe afaayamafekẽ. Akka Melquisedec xanĩfo finakõia ini Abraham sharafiano. <sup>5</sup> Israeli xoko fetsafo Levĩ ãfe fenafo Epa Niospa katonĩ. Nãfãfe ãto kaifo Epa Nios kĩfixopaonifo. Nãskakẽ Moisés yoini keskafakĩ nã ato Nios kĩfixomisfo kori fisti rasi ato inãpaonifo. Askatari ãto afama mĩshtifori ato inãnifo ãto kaifãfe. <sup>6</sup> Akka Melquisedec Levĩ ãfe fenayamafiano Abraham ãfe afama mĩshtifo fetsa fetsatapafa inãni. Nãskakẽ Melquisedec Abraham yoini iskafakĩ: “Abraham, mia Niospa axosharai,” ixõ yoini. <sup>7</sup> Chanĩma, keyokõi nõ tâpikõia fẽtsa ato finõkõixõ ãfe mekapa ato shara fatiro. Nãskakẽ nõ tâpia Melquisedec Abraham finõkõia. <sup>8</sup> Nãskakẽ nã israeli xoko fetsafãfe nã Levĩ fenafo afama mĩshti ato inãfinifono nãfo mã nai keyonifo. Akka Melquisedec Abrahamnã afama mĩshti fini. Akka Niospa meka yoikĩ kenenifo Melquisedec iskaratĩa nia keskara. <sup>9-10</sup> Levĩ fenafãfe ãto xini Abraham ipaoni. Nãskaxõ Abraham Melquisedec afarafo inãino Levĩfãfe akairi inãi keskafanifo. Nõ tâpiama afetĩara nani. Nãskakẽ nia keskara nõ famis. Nã Abraham Melquisedec afarafo inãitĩa



Abraham ãfe fena Leví anokai fakeama ini. Chipo Leví fakeni. Nãskakẽ nõ tâpitiro Melquisedec fistichi ãto xini Abraham yafi ato finõkõia.

<sup>11</sup> Efe yora mĩshtichi, shinãkapo. Epa Niosxõ Moisés noko yoini keskafakĩ Leví fenafãfe noko Nios kĩfixomisfãfe noko ifitirofono Niospa ãfe Fake nĩchikeranima Apa Nios noko kĩfixomis inõ. Cristokai Leví ãfe fena Aarón keskarama. Nã Cristo Melquisedec keskarakõi. <sup>12-14</sup> Akka tae fenai Leví ãfe fena Aarón ini. Nã Aarón yorafo ato Nios kĩfixomis ini fetsafãfe ãto xanĩfo. Akka nõko Ifo Jesúskai Leví ãfe fenama, xoko fetsa ini. Nãskax Aarón keskarama. Akka nõko Ifo Jesús Judapa fena. Nã Levipa chipoko Judá. Akka, “Judapa yorafãfe yorafo ato Nios kĩfixomisfo itirofora,” ixõ Moisés yoinima. Askafiano Niospa ãfe Fake Jesús nĩchini yorafo ato Nios kĩfixomis inõ. Nãskatari a Moisés yoini keskara Epa Niospa fetsafani.

<sup>15</sup> Nãskakẽ anã ã mato mẽstekõi yoisharapai. Iskaratĩa xafakĩakõi nõ tâpishara Nios afara fetsa yoini keskara noko Nios kĩfixomis ãfe fena Jesús, Melquisedec keskara nokoki nokoni. <sup>16</sup> Akka Moisés yoini keskarakõi Leví ãfe fenafo fisti ato Nios kĩfixomisfo itirofoki. Jesúskai Leví fenaxoma a Moisés yoini keskaraõnoax noko Nios kĩfixomis itirofoma. Askatamaroko Niospa Jesús katoni noko kĩfixomis inõ. ãfe sharaõxõ Epa Niospa Jesús otofani. Anã nanakama. Nãskax noko Nios kĩfixomis ipanaka Niospa sharaõxõ. <sup>17</sup> Nãnori Niospa yoiyoni David Jesucristoõnoa kenekĩ iskafani:

Mĩ Melquisedec keskara. Nãskaxõ mĩ yorafo Nios kĩfixomis ipanaka, ixõ kenei. <sup>18-19</sup> Nãskakẽ a Moisés yoini keskarakai

nō anā ifofaima. Nokokai imasharatiroma. Askatari nōko chaka noko soaxomisma nō Nios fe ĩpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō afe ipanaka.

<sup>20-21</sup> Akka Epa Niospa āfe Fake yoini keskafakīkai Leví āfe fenafo anori yoinima. Niospa yora shināmanaino iskara kenei, Niospa āfe Fake Jesús yoikī iskafani:

Na meka ě mia yoiai chanīmakōi. Nāskakē ě anā fetsapakenakama. Ē yorafāfe āto Ifokōi. Nāskakē a ě mia yoiai keskafakī yorafo mī ato ea kīfixomis ipanaka,

ixō Epa Niospa āfe Fake yoini. <sup>22</sup> Akka Apa Niospa nānori yoinikē nō tāpitiro Jesúsnoax Nios fe nō ĩpaxatiro. Akka Moisés meka askarama. Aōnoax Niospa yorafo nō itiro. Akka Epa Niospa Moisésxō Leví āfe fenafo yoini keskara sharafiano akka āfe Fake Jesús yoini keskara sharafinakōia.

<sup>23</sup> Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō. <sup>24</sup> Akka Jesúskaī ato keskarama. Nāfi nīpanakakī nāato noko Epa Nios mēxotaima kīfixomis ipanaka. <sup>25</sup> Nāskakē Apa Niosxō noko ifitiro nō afe ĩpaiyaito nokoōxō Apa Nios yoifafāini iskafakī: “Epa Niosi, ě ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskafakī noko nāskakōi faxoxii nō afe ĩpaxanō. Nāskaxkai nō fenopakenakama.

<sup>26</sup> Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia.

Tsōakai aōnoa afaa chaka yoitiroma. Aatokai afaa chaka shināmisma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro. <sup>27</sup> Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesúsakai ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro. <sup>28</sup> Akka Epa Niosxō Moisés yoini keskakakī yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafori nāfāferi afara chakafamisfo. Nāskakē Niospa yoiyoni keskakakī āfe Fake Jesús chipo katoni nokoōxō Nios kīfixomis ipaxanō. Aatokai afaa chakafamisma. Isharakōimis.

## 8

*Epa Niospa meka fenasharakōi yoini Jesús noko nāxonō nōko chaka noko soaxoxii*

<sup>1-2</sup> Akka nā sharafinakōia nō yoiai nāfi Apa Nios xanīfokōi ika ari afe ikaki. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanima. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfiti pexefā keskarakōifiax finakōia. Nāskakē nā ē mato kenexona keskara xafakīakōi mā tāpitiro.

<sup>3</sup> Nā ato Nios kīfixomis xanīfokōi inōfo Niospa ato katoni afarafo yorafāfe Nios inākata finōfo.

Askatari yoinã inafõ fixõ retekaxõ koofaxõ ato kifixonõfo ãto chaka ato soaxonõ Niospa ato ktoni. Nãskakẽ nã Jesús, noko Nios kifixomisto, nãatoro Nios inãni. Yoinã ina inãanima. Askatamaroko ãa noko nãxonõ nõko chaka noko soaxoxiki. Æfe Æpa amapaiyai keskara ani. <sup>4</sup> Moisés yoini keskafakĩ Levĩ Æfe fenafõs israelifãfe ato Nios kifixomis itirofo yoinã retekaxõ ato Nios inãxoxikakĩ Niospa ato chaka soaxonõ. Akka Jesúskai Levĩ Æfe fenama. Nãskakẽ Jesús nono mai ano ixõ nokoõxõ Apa Nios kífimis ikeranama. Akka nai mēra ixõ noko kifixomis, Niospa ato katoano. <sup>5</sup> Akka nono mai anoxõ nã Levĩ fenafãfe a anoxõ Nios kífiti karapa pexe mēraxõ yonopaonifo. Nãnoxõ ãto kaifo israelifo tãpimapaikakĩ Nios ika ari afe keskaramãkĩ tãpinõfo. Askafixõ askarakõi tsõa tãpiyonima. Nãskakẽ Epa Niospa Moisés yoini iskafakĩ karapa pexe fayõamano: “Ë mia yoiai keskafakĩ a anoxõ ea kífiti karapa pexe fafe. ¿Mã mĩ shinãimẽ ã mia machi anoxõ tãpimana keskara nãskakõi fafe karapa pexe fakĩ? Nãskakẽ a yonomisfo tãpimafe nã ã mia yoiai keskarakõi fanõfo,” ixõ Epa Niospa Moisés yoini. <sup>6</sup> Akka Niospa Æfe Fake Jesús yoini keskarato a Moisés yoini keskara finõkõia. Nãskakẽ Jesús Apa ika arixõ nokoõxõ Apa Nios kífifãfãini. Akka Levĩ fenafãfekai askafapaonifoma. Epa Niospa Æfe Fake Jesús yoiyoni keskarakõi ato yoimisma. Akka nã ato yoiyoni keskara sharafiano nã Æfe Fake Jesús yoini keskararoko sharafinakõia.

<sup>7</sup> Niospa Moisés yoini keskara nõ nikasharakõixõ nõ afara chaka nõ fakeranama. Akka nõ nikasharakõima. Nãskakẽ Epa Niospa

aõxõ noko ifitiroma. Nãskakẽ noko fetsa yoini iskafakĩ: “Ëfe Fake ã nĩchixii mato nãxonõ mato chaka soaxonõ. Mã Jesús Ifofaino ã mato ifixii,” ixõ Epa Niospa yoini. <sup>8</sup> Akka Epa Niospa Moisésxõ yoini keskarakai tsõa askara nikasharakanamax nõko xinifo nikayospakõi inifo. Nãskakẽ nõko Ifo Niospa yoini iskafakĩ:

Ë chipo na efe yorafo israelifo yafi Judapa ãfe fenafo meka fena shara ã ato yoixii. Nã ã ato sharakõi axõai keskara ã ato õimaxii. <sup>9</sup> Ë ãto xinifo Egipto anoa iyoni. Nãskaxõ ã ato yoisharani ãfe meka nikasharaifãfe ato kexesharafafãixikĩ. Ë ato yoisharafiaino ãfe meka kachikiri fanifo. Nãskakẽ ã ato potani. Akka a ãto xinifo ã ato yoini keskarakai ã ãto fenafo askara ã yoixiima. Askatamaroko ãfe meka fena shara ã ato yoixii ea nikasharanõfo. <sup>10</sup> A ã israelifo yoixiai kene fistiõxõ ã ato tãpimaxima. Askatamaroko ãto shinã mẽra ãfe meka shara ã nanexii ãto õiti mẽraxõ a kirika kenea keskara sharaõxõ shinãsharanõfo. Nã ã ato yoiai keskakõixii shinãsharaxikani. Nãskakẽ ã ãto Epa Nioskõi ixii. Akka afo efe yorafo ixikani. <sup>11</sup> Akka anã fisti rasichi ato tãpimaxikanima. Keyokõichi ea tãpixikani. Yorafo afamafãferi ea tãpiaifono, xanĩfofãferi ea tãpikõixikani. Nãskakẽ anã eõnoa tsõa ato tãpimaxima akõi keyokõichi mã ea tãpikõiafono. <sup>12</sup> Ë ato chaka soaxoxii afara chakafafiaifãfe. Nãskaxõ a afara chakafamisfo ã anã shinãpakenakama,

ixõ Niospa yoini. <sup>13</sup> Nãskakẽ Niospa anã ato yoini iskafakĩ: “Meka fena shara ã mato yoinõ,” ixõ ato yoini. Akka a Moisés ato yoini keskarakai anã tsõa

shinãtiroma. Nã Moisés ato yoini keskara meka xinikõi. A mekakai anã tsõa shinãpakenakama. Nãskakẽ nã meka shinãmakipakenakafo.

## 9

*Karapa pexe kene fetsa mēraxõ Epa Nios ato kīfixopaonifo. Akka iskaratīa Jesús noko kīfixomis Apa Nios ika arixõ*

<sup>1</sup> Ë mato yoinõ afe keskara yorafo ipaonifomakĩ. Akka Epa Niospa Moisés yoini afeskaxõ nono mai anoxõ afe yorafo ato Nios kīfixotirofomākĩ Niospa ato chaka soaxonõ. Akka karapa pexe fanifo a mēraxõ Nios kīfinõfo. <sup>2</sup> Akka a karapa pexe fanifo mēra kene rafe ini. Nã kene rekētana mēra siete rāpari oro otatia metax keskara ini. Askatari mīsari a mēra ini. Nã mīsa kamaki mēxotaima doce pāa fapaonifo. Nã kene rekētana anenifo iskafakakĩ: “Nios chaimashta ika,” ixõ anenifo. <sup>3</sup> Akka karapa pexe fanifo mēra sama namikõi nakirafekõi potexõ xītia ini. Nã kene chikaya anenifo iskafakakĩ: “Nono Nios ikõina,” ixõ anenifo. <sup>4</sup> Nã kene rekētana ketaxamei mīsa kafāshara oroya taxta fanifo ini. A kamakixõ nakas potoshara kooati ipaoni. Nãskatari kene chikaya fetsa mērari kafo oroya taxtafanifo ini. Nã kafo mēra pāa keskara āfe ane mǎnǎ kecho oro mēra nanea ini. Akka Aarón āfe chatiri nã kafo mēra naneyoamano Niospa nã Aarón āfe chati charofo onifayoni. Nãskata Aarón āfe chati chipo kafo mēra naneni. Nãskatari Niospa Moisés āfe meka makexki kenexõ ināni nikanõfo. Nã makex para Niospa mekaya nã kafo mēra nanea ini. <sup>5</sup> Nãskakẽ nã kafo mǎmǎkǎ Niospa āfe ājiri keskara raferi

nia ini. Āto peta rafeta kafo fepoafu keskara ini. Nāskakē nā Niospa āfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafaōnoakai ē mato iskaratīa yoitiroma.

<sup>6</sup> Nāskakē nā Nios kīfiti karapa peke kene rekētana mēra a ato Nios kīfixomisfo mēxotaima ikipaonifo anoxō nakas potoshara koofaino ato Nios kīfixoxikaki. <sup>7</sup> Akka a kene fetsa mērari tsoa ikitiroma ipaoni. Nā ato Nios kīfixomis xanīfo finakōia fisti ikipaoni. Xinia fisti ata ikipaoni. Nāskatari imimais ikipaonima. Yoinā imiya ikipaoni nā imi Epa Nios ināxikī āfe chaka soaxonō, askatari afe yorafori ato chaka soaxonō. <sup>8</sup> Nāskakē Niospa Yōshi Sharapa xafakīa noko tāpimani. Akka nā karapa peke iyoano āfe kene fetsa mēra tsoa ikipaonima. Nā ato Nios kīfixomis xanīfokōi fisti ikipaoni Nios fe mekaxiki. Yorafo Epa Nios fe mekayoxoma, Nios ato kīfixomis xanīfo fisti yoiyopaonifo. <sup>9</sup> Nāskakē nā ipaonifoōnoa iskaratīa noko shināmatiro Moisés ato yoini keskafakī. Karapa peke ano yoinā ina retexō ināpaonifo Niospa āto chaka ato soaxonō. Askafikanax isharapaonifoma afara chakafakaxō shinātaifapaonifo. <sup>10</sup> Akka Moisés ato yoini keskafakī a ato Nios kīfixomisfāfe nāskakōi fanifo. Nāskaxō afara shara fetsafori ato tāpimani Moisés meka. Afara pita, afara ayata mā fatiro ato fani. Askatari afaari mā pitiroma, afaari mā ayatiroma ato fani. Askatari ato tāpimani afeskax mechokometirofomāki Epa Niospa ato nikakōinō. Akka askafiaifono afāfekai ato chaka soaxokōitirofoma. Cristo oyoamano nānori Niospa

ato yoiyoni. Nã Cristo naitĩa aõxõ keyokõi Niospa fetsafani. Nãskakẽ nõ Jesús Ifofaino, Niospa nõko chaka noko soaxotiro. Nãskakẽ a Moisés yoini keskara anã tsõa ifofasharatiroma ãfe chaka soapaikĩ.

<sup>11</sup> Akka Cristo mã anã nai mẽra kaax, noko Nios kĩfixomis xanĩfokõi ini. A Niospa noko yoiyoni keskara noko inãmis. A karapa pexe anoxõ a ato Nios kĩfixomisãfe ato Nios kĩfixopaonifo yorafãfe anifo. Akka Jesús noko kĩfixomis ano sharafinakõia Nios fistichimãi nai fanino. <sup>12</sup> Akka Cristokai karnĩro imi fota fakka fakeshtari fonima. Askatamaroko nokoõnoax nakĩ ãfe imi foax ikisi Apa Nios ari kani. Nãskaxkai anã Jesús nanakama. Nãskaxõ nõko chaka noko soaxonano ãfe Apa Nios ari nõ katiro. <sup>13</sup> Akka chanĩma, karnĩro yafi fakka retekaxõ ãfe imi fikaxõ nã karnĩro koofakaxõ ãfe chii mapoya nã imi osikaxõ saa saa anifo Epa Niospa ato chaka soaxonõ anã choshta keskara iyamanõfo. <sup>14</sup> Akka Cristokai afaa chakafamisma. Nãfi sharafinakõia. Niospa Yõshi Shara a nĩpanakato Jesús shinãmani. Nãskakẽ Apa yoini iskafakĩ: “Epa, ẽ atoõnoax naikai. Nãskakẽ ẽfe imi foano eõxõ mã ãto chaka soaxotiro mefe yorafo inõfo,” ixõ Apa yoini. Akka a nõ Nios inimamapaikĩ nõ shinãpaoni keskara nõ anã shinãima. Akka iskaratĩa nõ Nios inimamapaikĩ nõ nikasharakõitiro. Nã Nios nĩpanaka sharafinakõia.

<sup>15</sup> Akka a Moisés ato yoini keskara sharafiano tsõa nikapaonima. Afara chakafapaonifo. Nãskakẽ nã afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anã ato yoitiro. Nãskakẽ



Cristo oni nokoõnoax naiyoi nõko chaka noko soax-oxiki nõ Nios fe ipaxanõ. Nãskakẽ Niospa noko yoini iskafakĩ: “Ekeki fekãfe ãfe Fakeõnoax efe yorafo ixikakĩ,” ixõ noko yoini. Nãskaxõ a noko yoyoni keskara noko inãxii. <sup>16-17</sup> Iskaratĩa afara fetsa ã mato yoinõ mã tãpinõ. Nõ nayoxoma nõ yoitiro iskafakĩ ato yoikĩ: “Ë naano tsõa ãfe afarafo fiiimãkai ikisi ã mato tãpimayonõ,” ixõ nõ yoitiro. Nãskakẽ nã nõ yoyomis keskafakĩ nõ nayoxoma nõko afarafo fetsafo inãpaikĩ nõ yoitiro. Akka nõ nayoamano nõko afarafo tsõa fena fitiroma. <sup>18</sup> Nãskakẽ Niosxõ Moisés afe yorafo yoini ãto yoinã inafõ reteaifono imi fonõ. Akka a yoinã inafãfe imi foyamaino a ato yoyoni keskafakĩ Niospa ato chaka soaxotiro. <sup>19-20</sup> Taefakĩ Epa Niospa shinãmanaino Moisés israelifo keyokõi ato yoini nikanõfo. Mã ato yoikĩ mitoxõ, nã ifi hisopo ãfe põya pishta fini. Mã fixõ fakka fake imi yafi oveja imi fakkaya osini. Nãskaxõ ifi hisopo põya pishta fixõ oveja raniya texkeani. Nãskata nã ifi hisopo põya pishta texkeata fakka fake imiki momo momo axõ nã Niospa meka kirikaki kenea a Niospa yoyoni keskafakĩ fakka imi saa saa ani. Askatari yorafokiri fakka imi saani. Ato yoikĩ iskafayanã: “Na imioxõ mã tãpitiro Epa Niospa noko yoyoni keskara axii. Nãskax nõ afe yorafo itiro,” ixõ Moisés ãfe kaifo yoini. <sup>21</sup> Nãskatari nã karapa pexe a mëraxõ Nios kĩfiti Moisés imĩ saa saa ani, askatari a mëranoafori keyokõi imĩ saa saa ani. <sup>22</sup> Chanĩma, nã Epa Niospa Moisés yoini keskafakĩ Moisés imi saakano karapa pexe anoafõ keyokõi ato chaka soaxona. Akka imi foyamaino noko

chaka soaxotiro. Anã ano fato fetsama nõko chaka noko soaxotiro.

*Cristo nõkoõnoax nani noko chaka soaxoxiki*

<sup>23</sup> Nã anoxõ Nios kīfiti karapa pexe mēranao keskarakõifo Nios ika ari. Nãfoki ato Nios kīfixomisfāfe yoinã imi saanifo Niospa afo õisharanõ. Akka a karapa pexe mēranao imifo sharafiano afāfe nõko chaka noko soaxotiro. Askatamaroko nã Cristo nokoõnoax nai fistini nõko chaka noko soaxoxiki. Noko chaka soaxonano Nios ika ari nõ katiro, a keskara shara afe ipaxakī. Askatari anokai a anoxõ Nios kīfiti karapa pexe keskarama. A Nios ika ano sharafinakõia. <sup>24</sup> Akka yorafāfe karapa pexe fanifo anoxõ Nios kīfinõfo. Nãskakē a mēra a Nios nai mēra ika keskarakõi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nãskakē iskaratīa ari afe ika noko Apa Nios kīfixõfafāixiki. <sup>25</sup> Akka nã ato Nios kīfixomis xanifo karapa pexe kene fetsa mēra ares fisti xinia fisti akax ikipaoni a mēraxõ Nios kīfixiki. ãfe imikõiya a mēra ikitamaroko, yoinã imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki. <sup>26</sup> Akka askakatsaxakī Cristo nokoõnoax nai ranã ranãkerana nã Niospa mai onifanichāi. Akka askamisma. Jesús nai fistini ikisi noko keyokõi chaka soaxoxiki. <sup>27</sup> Akka keyokõi nõ nai fetsexii. Nõ naax keyokõi nõ akiki nokoaito noko yoixii a nõ niyoxõ amis keskara. Nãskakē a nõ amis keskara noko yoiaino nã Jesús Ifofaafo tii afe isharpakenakafo. Akka nã nikamisfoma omiskõipakenakafo mēra ato potaxii. <sup>28</sup> Cristo āari ināmeax noko naxõi fistini. Yora ichapafõnoax

omiskõixõ noko nãxoni. Askafiax anã ãfe yorafoki oxii, noko ïkisharapakexakĩ. Nãskakẽ anã nokoõnoax nanakama noko chaka soaxoxiki. Askatamaroko aõnoax nõ isharapakenaka.

## 10

<sup>1</sup> Niospa Moisés yoini keskaraõxõ nõ tãpitiro Cristo noko afarasharakõi faxoxiai. Nãskakẽ nã Moisés ato yoini keskarakai tsoa imasharatiroma. Afia Moisés ato yoini keskafakĩ nã xinia tii a ato Nios kĩfixomisfãfe yoinã inafõ retepaonifo Niospa ato chaka soaxonõ. Askatari a Moisés yoini keskaratokai ato imasharamisma Nios fe ïpaxanõfo. <sup>2</sup> Akka a ato Nios kĩfixomisfãfe yoinã inaoxõ ato chaka soaxonaifõno, tsõa anã ak-eranama yoinã ina retekĩ. Æfe chakaõxõ anã shinãchakakeranama. Nãskakẽ anã tsõa yoinã ina retekeraanama. <sup>3-4</sup> Akka askarama. Nã xinia tii cabra ato retexonaifotĩa nã afara chakafamis keskara ato shinãmapaonifo. Akka yoinã ina imioxõ ãfe chaka ato soaxotiroama.

<sup>5</sup> Nãskakẽ Cristo mai ano fotoyoxoma Apa yoini iskafakĩ:

Epa, mĩkai fichipaima yoinã ina imioxõ ãto chaka soanõfo. Askatamaroko yorakõi mĩa ea onifani ãfe yora ã mia inãnõ. Nãskaxõ yorafoõnoax naxõ ã ato chaka soaxoxiki. <sup>6</sup> Akka yorafãfekai mia inimamakanima yoinã ina retekaxõ kooakĩ mĩ ato chaka soaxonõ, ixõ yoini. <sup>7</sup> Akka anã mẽ mia yoia iskafakĩ:

Mẽ nono mai ano fotoa a mĩa amapayyai keskara ã axiki. Nãnorikõi mĩ meka yoimisto eõnoa yoikĩ keneyoni,

ixō Cristo Apa yoini. <sup>8</sup> Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retekāfe āfe imi foano aōxō Niospa mato chaka soaxonō,’ ixō ato yoini. Akka a yoinā retexō koakaxō mia ināifāfekai afāfekai mia inimamaima,” ixō Apa yoini. <sup>9</sup> Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. <sup>10</sup> Nāskakē a Apa amapaiyai keskaī Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

<sup>11</sup> Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. <sup>12</sup> Akka Jesucristo mā noko nai fistixoni noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. <sup>13</sup> Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii. <sup>14</sup> Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nōkoōnoa ōipakenakama. Nāskakē nōri a keskara sharakōi ixii.

<sup>15-16</sup> Nānori Niospa Yōshi Sharapa noko yoiyoni

iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo, ixō yoini. <sup>17</sup> Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. <sup>18</sup> Akka mā noko chaka soaxonano, nāskakē nō anā yoinā ina inātiroma noko chaka soaxonō.

### *Nios fe rafesharakōikāfe*

<sup>19</sup> Efe yora mīstichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. <sup>20</sup> A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēranoa sama nāmīfā faxetani anā tsoa ikiyamanō. Nāskakē nākōi nā Nioskōi nō kīfitiro. <sup>21</sup> Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakefāfe āto Ifokōi. <sup>22</sup> Nāskakē nō Jesús chanīmara fakē nā noko nāxonioxō nōko ōiti fena sharakōi noko faxotiro. Nāskaxō a nō afarafo chakafamis keskarāfo anā nō shinātiroma nōko ōiti inimakōitiro. Nāskaxō faka sharapa nashimana keskara noko fatiro anā afaa chaka nōko shinā mēraxō nō shinānōma. Nāskakē Nios fe rafekāfe. <sup>23</sup> Akka nō yoikī iskafamis: “Jesús nōko Ifokē Epa Niospa a noko yoyoni keskara noko axoxii,” ixō nō yoimis. Nāskakē afaa fetsa shināyamakāfe. Nā nō shināi fisti shināfafāikāfe. <sup>24</sup> Akka Epa Niospa

noko sharafamis. Nōri nō shināsharanō afeskaxō nō fetsafo shināmasharatiromākī nōinā faatanākaxō afara axoshara faatanānōfo. <sup>25</sup> Mā mā tāpia mā Jesús chaima oi. Akka fetsafo anā ichanāmisfoma. Nāskakē ato keskara iyamakāfe. Nāskakē ichanāi xateyamakāfe. Jesúsnoa mā shināi keskafakī fet-safori yoitaifakāfe māto ōiti inimasharakōinō.

<sup>26</sup> Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifixō afara chakafakī nōko Ifo Jesús kachikiri fakī, askarakai Niospa āfe chaka soaxotiroma.

<sup>27</sup> Nāskarafo Niospa ato omiskōimaxii. Akka Niospa ato ōiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakafo mēra fotakāfe, chiifā mēra,” ixō ato yoixii. <sup>28</sup> Akka fētsa nā Moisés yoini keskara nikakaspakī afara chakafaito fētsa ōixō xanīfo yoimis. Fistichi yoyamakī rafeta yoitiro, askayamakī trespa yoitiro iskafaki: “Mā nō ōia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafaa mā natiro,” ixō yoitiro.

<sup>29</sup> Akka nā Moisés yoini keskara nikakaspaifo afo reteaonifo keskafakī fatorafāferi Jesús nikakaspamisfokē Niospa ato omiskōimakī finakōixii. Nāskakē nā yora chakafāfe shinākī iskafamisfo: “Mē nikamis Jesús ea nāxoni. Nā naino āfe imi foni. Nāskaxō ea katoni aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shinākī nāto Niospa Fake nikakaspakōimis. Askara meka yoikī Niospa Yōshi Shara chakafakī mekafamis, Niospa Yōshi Sharapa sharafafiamisno noikī. <sup>30</sup> Akka mā nō tāpia Niospa yoikī iskafani: “Afara chakafaifāfe

ẽ ato omiskõimaxii,” ixõ yoini. Askatari yoikĩ iskafani a kirika keneano: “A ea Ifofaafãfe afara chakafaifono ẽ ato omiskõimaxii,” ixõ yoini. <sup>31</sup> Akka fatorafãfe nõko Ifo Jesús kachikiri fakaxõ afara chakafariafaifono atonã fãsi mesekõi ixii. Nãskakẽ askarafo nã Nios nĩpanakato ato achixõ ato omiskõimakĩ finakõixii.

<sup>32</sup> Shinãkapo efe yora mĩshtichi. Mã taefakĩ Jesúsnoa tãpixõ mã Ifofani keskafakĩ shinãmakiyamakãfe. Fetsafãfe mato Jesús Ifofatimafaifono ato nikatama mã nõko Ifo Jesús Ifofasharakõipaoni. <sup>33</sup> Nãskaxõ mã Jesús Ifofasharaito õikakĩ fetsafãfe mato ĩchayanã mato omiskõimamisfo. Akka a Jesús Ifofamis fetsafori omiskõiaifono mãri ato fe omiskõipaimis. <sup>34</sup> A Jesús Ifofaa fetsafo karaxa mẽra ato ikimanifo. Nãskakẽ mã ato noiyanã ato inimamapai karaxa mẽranoa mã ato õikai kani ato shinãmasharata ato inimamaxiki. Nãskatari nã Jesús Ifofaafãfema mãto afarafo mato fiakĩ keyokõinifo. Mato askafafiaifono a shinãchakatamaroko mã tãpini Epa Niospa nã ika arixõ mato afara mekexona afokai fenopakenakama. Nãskara tãpiax mã inimakõini. <sup>35</sup> Nãskakẽ a mã Jesús chanĩmara faa keskafakĩ kachikiri fayamakãfe. Mã kachikiri fayamakẽ Epa Niospa mato sharafaxii noko yoiyoni keskafakĩ. Nãskaxõ afara shara mato inãxii. <sup>36-37</sup> Akka Niospa meka keneni iskai:

Cristo mã chaima matoki oi, samarakaima, ixõ kenenifo. Nãskakẽ mã Jesús Ifofasharai keskafakĩ omiskõifikĩ tenekãfe. Epa Niospa mato inãpaiyai keskara aõxõ nã mato yoiyoni keskara mã fixii. <sup>38</sup> Nãskaxõ anã Niospa meka kenenifo

iskafakĩ yoikĩ:

Nã ea chanĩmara fai ã imasharaito, nãato ea Ifofasharakõixii. Akka nã ea kachikiri faafoki ã inimaxima,

ixõ Niospa yoini kirika keneano. <sup>39</sup> Nãskarafãfe Jesús kachikiri fakanax omiskõipakenakofo mẽra fokani. Akka nõkai askarama. Askatamaroko nõ Jesús chanĩmara fakõimis noko nimasharapakex-anõ nõ afe ipaxakĩ.

## 11

### *Nios nikakõipaonifo*

<sup>1</sup> Akka nõ Epa Nios chanĩmara fakõixõ a noko yoiyoni keskara noko axoyoamano nõ chanĩmara fai chipomãi noko axõfaito. Nãskarifiakĩ a noko yoiyoni keskara nõ õiyamafixõ ãfe mekaõxõ nõ chanĩmara fai. Nãskara nõ shinãkĩ nõ Nios chanĩmara fai. <sup>2</sup> Nãskakẽ nõko xinifãfe Niospa ato yoini keskara chanĩmara fakõipaonifo. Nãskakẽ Epa Nios atoki inimakõikĩ atoõnoa meka shara yoini.

<sup>3</sup> Akka nõ chanĩmara faxõ nõ tãpitiro Niospa ãfe mekapa mai yafi nai onifani. A nõ õiyomisfoma afarafo Niospa onifani, akka iskaratã mã nõ õitiro. Nãskakẽ ãfe mekapas keyokõi onifani.

<sup>4</sup> Ë mato yoinõ nikakapo mã tãpinõ a nõko xinifo ipaonifo afe keskaramãkĩ. Nõko xini Abel Nios chanĩmara faxõ oveja fake inãni nã Niospa yoini keskafakĩ. Nãskakẽ Nios akiki inimakõini. Akka ãfe ochi Caĩnkai askara inãnima. Nã Caĩn Nios nikakas-payanã ãfe afarafo inãpaiyaito Niospa fichikas-pani. Akka ãfe exto Abel Nios chanĩmara fakõikẽ Niospa aõnoa yoikĩ iskafani: “Mĩ ea chanĩmara fakõina,” ixõ yoini. Abel Nios chanĩmara faax



mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

<sup>5</sup> Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiai keskafakī ea nikakōimis. Nāskakē ē akiki inimakōi,” ixō Niospa yoini. <sup>6</sup> Akka nō Nios nikayamakī nō Nios in-  
imamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nika-  
paikōikī chanīmara fayana akiki nokoaito Niospa noko afara shara faxoxii.

<sup>7</sup> Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiai keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

<sup>8</sup> Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafiax nā Niospa yoia keskakōini. <sup>9</sup> Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani.

A keskarafu inima. Nānoax peXe keskara a karapa peXe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mātō mai ināxii,” ixō yoini. <sup>10</sup> Nāskakē Abraham manapaoni. Akka Niospa yoini keskara nā mai ano ifiaxō tāpīpaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

<sup>11</sup> Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiai keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini. <sup>12</sup> Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

<sup>13</sup> Nā ē yorafoōnoa mato rama yoia keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafikaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. <sup>14</sup> Akka nānori yoiaifāfe nō tāpitiro nāskara yorafo nono mai ano

ipaitama Nios ika ari fopaikani afe ipaxakakī.  
<sup>15</sup> Akka a ipaonifo ano shinākani āto mai ano anā fopaikani fokeranifo. <sup>16</sup> Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinākōia. Nāskakē Epa Niospa a ika ari ato pexe shara faxoni afe ĩpaxanōfo. Nāskakē Niospa atoōnoax inimakī ato yoikī iskafani: “Ēfi mātō Nioski,” ixō atoōnoa yoini inimayanā.

<sup>17-18</sup> Anā Abrahamnoa ě mato yoinō. Epa Niospa tāpipaini Abraham chanīmara fakī nā yoia keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. <sup>19</sup> Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ě shinā Niospa afama mīshti fatiro. Akka ěfe fake nafiakē Epa Niospa samama ea otofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otofaxotiro.

<sup>20</sup> Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobo yafi Esaú, chipo Epa Niospa afara shara mato faxoxii,” ato fani.

<sup>21</sup> Nāskarifiakī Jacobori Nios chanīmara fakōipaoni. Nāskakē mā chaima naito Niospa

ãfe shinã mēra shinãmanai keskafakĩ ãfe fafa rafe, José fake rafe, Niospa ato shara faxonõpokofai ato yoini. Ato yoita ãfe chatiki mēstexõ Epa Nios kĩfiyanã aicho fani.

<sup>22</sup> Nã Joséri Nios chanĩmara fakõipaoni. Nãskaxõ mã chaima nakĩ ãfe yorafo yoikĩ iskafani: “Chipo Epa Niospa nõko fenafo nã israelifo Ejipto anoa ato iyoxii kiki. Fokakĩ ěfe xaori foxikani kiki. Nã ikaifo ano ea maifaifoxikakĩ,” ixõ ato yoiyoni.

<sup>23</sup> Moisés ãfe apa feta ãfe afa Nios chanĩmara fakõipaonifo. Nãskakẽ Moisés yomeax sharapishtakõikẽ ãfe apa feta ãfe afa õini. Nãskaxori tãpinifo mã yosixõ a Niospa yoiai keskara yonosharakõixiaito. Nãskakẽ Ejipto anoa xanĩfãfe ato yoini a israelifãfe ãto fake feronãfake yome mĩshti keyokõi ato rētekĩ mitokakõinõfo. Askafiaifono Moisés ãfe apa feta ãfe afa Nios chanĩmara fakaxõ ratekakima tres oxe anifo ãto fake onekakĩ xanĩfãfe ãto fake rēteyamanõ.

<sup>24</sup> Moisés ãfe chata keskara ini Faraón. Askafai-aifono Moisés askara fichikaspani. Nãskaxõ ato yoini iskafakĩ: “Xanĩfo Faraónkai ěfe chatama. Āfe fakerikai ěfe efama,” ixõ ato yoini, chanĩmara fanõfo israelifo ãfe kaifo ini. Moisésri Nios chanĩmara fakõipaoni. <sup>25</sup> Akka Moisés shinãni iskakĩ: “Ě Ejipto anoax xanĩfãfe pexe ano ikax ěri ato fe inimasharakai xini ranã ayanã ě afara chakafatiro Nios shinãyamakĩ. Ě askapaima,” ixõ shinãni. Askapaitamaroko iskafakĩ shinãni: “Ěkai ejiptofo feta afara chakafapaima, askakimaroko ěfe kaifo fe nã Niospa inafõ omiskõiaifo keskai ěri ato fe omiskõi. <sup>26</sup> Ě Egipto anoafõ ato afara

fīapaikī ē ato fīakerani. Ē fīaxoma, ea mekafafiai-fono Egipto anoafāfe, nāskanō. Akka afarafoyafīax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe īpaxanō,” ixō shināni.

<sup>27</sup> Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akiki ōitifishkifiaino akiki mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima. <sup>28</sup> Akka Ejipto anoax israelifo foyoafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafo rēteyamanō, nā Ejipto anoafo āto fake iyoafo ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafo nanima.

<sup>29</sup> Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainaifono ato acho Ejipto anoafo fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē āsai mitokomenifo.

<sup>30</sup> Akka Niospa israelifo yoini: “Nā Jericō pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni. <sup>31</sup> Akka keyokōi

Jericó anoafo nai keyonifo. Akka nã kěro chotaferoma ãfe ane Rahab nã fisti nanima nãatomãĩ mã Nios chanĩmara faax. Akka Jericó peXe rasi ano foyoafomano israeli xanĩfãfe feronãfake rafe nĩchini ato onãti fatanõfo. Mã foafono nã rafe Rahab ãfe peXe mẽra ato ikimani tsõa ato fichixõ reteyamanõ. Nãskakě nã Rahab tsõa retenima ãfe kaifo retefikakĩ.

<sup>32</sup> Akka, ¿anã afaa fetsa ĩ mato yoitiromě? Nã yora ichapafãfe Epa Nios chanĩmara fapaoni-foõnoa ĩ mato yoikĩ keyotiroma. Nã Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nã Niospa meka yoimis fetsafoõnoari ĩ mato yoipanã ĩkai yoikĩ keyotiroma. <sup>33</sup> Nãskakě afãfe Epa Nios chanĩmara fakaxõ ãto sorarofo yoinifo a ato noikaspaifo ato retenõfo. Nãskakě a ato noikaspaifo ato retepaifikakĩ finõkõinifo. Akka atiri xanĩfo ikaxõ ãfe yorafo kexesharapaonifo isharanõfo. Nãskakě a Niospa ato yoiyoni keskara ato axosharani. Nãskatari atiri nã Nios Ifofaafãfema poomã mẽra ato potanifo. Askafiaifono Epa Niospa ato kexesharani poomãnã ato pinõma. <sup>34</sup> Akka atiri xanĩfo chakafãfe ato yoinifo chiifã mẽra ato potanõfo. Chii mẽra ato potafiafono Niospa ato kexesharani koonõfoma. Atiri kenofãfe ato retepaifikakĩ tsõa ato retenima. A isinĩ ikani ato yora pachikõifokě afori Niospa ato mitsiskõĩ imani. Nãskakě nã ato noikaspaifãfe ãto sorarofãfe ato retepaifiaifono nãfãferoko ato ĩchonifo ato afeskafanõfoma. <sup>35</sup> Kěrofãferi Nios Ifofaino, fake naano Niospa ato otofaxoni anã ninõ.

Akka fetsafo Nios chanĩmara fakõinafono

nā Nios Ifofaifāfema ato omiskōimanifo ato retekakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato reteyoafomano shinākī iskafanifo: “Noko retefiaifono Epa Niospa samama noko ōtofatiro nō afe ĩpaxanō,” ixō shinānifo. <sup>36</sup> Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otepkere axō ato karaxa mēra ikimanifo. <sup>37</sup> Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafaifono. Nāskakē nā afaamaisfāfe ano rapatiamano oveja fichi iyamai cabra fichi rapati fakaxō safenifo. Ato retepaikakī ato ĩchorifaifono. Nāskakē omiskōikōinifo. <sup>38</sup> Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafo a Nios Ifofaafāfema ato shara fanifoma Niospa ato ōia sharafiafono, ato chakafapaonifo.

<sup>39</sup> Nāskakē nāfo omiskōi finafikakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifikani isharakōimisfo,” ixō Niospa atoōnoa yoini. Askafikaxō a Niospa ato yoiyoni keskara tsōa fima ini. <sup>40</sup> Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

# 12

## *Nō Jesúsnoa shināsharatiro*

<sup>1</sup> Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi. <sup>2</sup> Akka nō Jesús fisti shināfafāinō. Nāfi nōko Ifokōikī noko tāpimamiskōi. Akka nāato noko ōimakī taefanikī afara afeskara afiaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe fero-taifi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

<sup>3</sup> Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matori omiskōimanaifono, shināchakatama māto ōiti fekaxtefayamakāfe. Nāskaxō a Niospa mato amapaiyai keskara mā enetiroma. <sup>4</sup> Akka yorafetsafāfe mato afara chakafamapaimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsroko omiskōi finakōini. <sup>5</sup> Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa kenenī:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimani mī ea nikanō, mī ea Ifofasharanō. Ē mia



askafaino, akai afamara mĩ fatiroma. Askatari shināchakayamafe. Tāpisharafe. <sup>6</sup> Nā ē aō noiai tāpimasharai aō noikĩ. Ēfe fake keyokōi omiskōimani anā nikasharanō, ixō kenei a Niospa shināmanaino. <sup>7</sup> Epa Niospa mato tāpimapaiyai keskara tāpikāfe. Nāskax omiskōifikĩ shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakĩ Epa Niospa mēstekōi nokori tāpimani. <sup>8</sup> Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiro. Nāskax nōri āfe yorafo itiro. <sup>9</sup> Akka nō yomekē nōko epafāfe nono mai anoxō noko tāpimapaonifo. Nāskakē nō shinākĩ nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro. <sup>10</sup> Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikĩ Epa Niospa mēste shināsharakōikĩ, nokori shara fapaikĩ noko tāpimamis a keskara shara nō inō. <sup>11</sup> Chanīma, noko tāpimayanā noko omiskōimanaino nō shara meetiro. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

### *Nō Niospa meka nikakaspaino mesekōi ixii*

<sup>12</sup> Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakĩ kachikiri fatama nikasharafafāikāfe. Nāskatari āfe meka shara nikakĩ enepaiyamakāfe. Yora pachi

keskara iyamakãfe. <sup>13</sup> Nãskax isharakõikãfe Jesús Ifofasharaxikakĩ. Mã askaito õikani nã Jesús Ifo sharafaafoma mato fe rafepaitirofo Jesús keskara shara ipaikani.

<sup>14</sup> Nãskakē mēenãpaitama keyokõi yorafo fe isharafafãikãfe. Nãskatari Jesús keskara shara ipaikãfe. Akka tsoa Jesús keskara shara iyamakani afãfekai nõko Ifo õinakafoma. <sup>15</sup> Epa Niospa noko noikõikĩ ãfe Fakeoxõ noko sharafa fafafãimis. Nãskakē a Niospa noko amapaiyai keskara akãfe fenoxikakima. Askatari mato shinãmã afaa shinãyamakãfe. Akka mato shinãmã mã afara shinãkĩ fetsafori mã ato afara chakafamatiro akairi askara anõfo. <sup>16</sup> Nãskatari mato ãfima fe iyamakãfe. Kērofori mato fenema fe iyamakãfe. Akka nõ naino, nõko fake iyoato nõko afama mĩshti fitiro. Akka Esaú shinãsharanima. Fonãikĩ ãfe exto yõkani ãfe exto pimanõ. Nãskaxõ a ãfe apa inãpaiyai shinãkima ãfe exto yoini iskafakĩ: “Epa naano ãfe afama mĩshtifo ẽ fiái ẽ mia inãnõ kopifakĩ,” ixõ yoini. Nãskakē nã Esaú keskara iyamakãfe. Atokai Niosnoa shinãpaonima. Akka a Niospa mato inãpaiyai keskara fikaspakĩma, fikãfe. <sup>17</sup> Mã mã tãpia ãpa afara shara inãpaiyai keskara fipaifikĩ finima. Nãskaxõ apa yõkakĩ iskafani: “Epa, a mã inãpai keskara ea inãfe, ẽ mĩ fake iyoakõi,” ixõ oiayanã yõkafaito ãpa inãnima mãmã chipokoto fiano. Nãskakē õisharakãfe. Mã Nios nikayamai mãri Esaú keskara itiro. Nãskakē Niospa mato inãpaiyai keskara mã fitiroma.

<sup>18</sup> Epa Niospa a nõko xinifo yoini keskara iskaratĩa noko yoimisma a keskara. Ato yoini machi ãfe ane Siõn tenãmã fotanõfo anoxõ afara

fetsa ato yoixiki. Akka nã machi anoax chiifã erepafãkõi, askatari kõi fakishifãkõi, askatari nêfefãkõiyana kana piishini. <sup>19-20</sup> Nai mêranoax maneti fãsikõi chã chãisaito nikanifo. Nãskatari nai mêraxõ fãsikõi ato yoiaito nikanifo ato Niospa iskafaito: “Na machi ano tsõa mãpetiroma. Mãpeaifãfe tokirinĩ ato tsakakĩ retekãfe. Askatari yoinãfãferi mãpeaito mã retetiro,” ixõ ato yoiaito nikanifo. Nãskakẽ ratekõikakĩ Moisés yoinifo iskafakakĩ: “Moisés, nõ anã Niospa meka nikapaima. Mãchi ari mãpei nõ narisatiro. Nãskakẽ Nios yoife noko anã yoyamanõ,” ixõ israelifãfe Moisés yoinifo. <sup>21</sup> Akka Moisésri nã õia keskara ato yoini iskafakĩ: “Ëri fãsi ratekõi, tari tari iki,” ixõ ato yoini.

<sup>22</sup> Akka nõkai machi Siõn ano nõ kaima. Askatamaroko machi Siõn fetsa ano nõ kai, ãfe ane fetsa nã Jerusalén Fena ano a Nios ika ari. Nãskakẽ nãnoax ãfe ãjirifo ichanãkaxõ, “Nios sharara,” fafafafãikani. Akka nã ãfe ãjiri ichapakõifo tsõa ato tanãtiroma. <sup>23</sup> Nãnori nõ keyokõi a Jesús chanĩmara faafo afe ixii. Akka nã Nios ika ari ãto anefo kenea afe ãpaxanõfo. Nãskakẽ nõri nõ Nioski nokoa. Nãskakẽ noko yoixii fatofãfe Ifofakanax afe ipanakafomãki. Nã Ifofaafos a keskara shara ato nai mêraxõ imai afaa chakafamisfoma keskara inõfo. <sup>24</sup> Jesús noko nãxoyoamano tsõakai nokoõnoax nãxoyonima. Nãskakẽ iskaratĩa Jesús noko nãxonikẽ nõ Nios fe isharapakexatiro. Akka nõko xini Caín onefetsa Abel reteni. Nãskakẽ Epa Niospa Caín yoikĩ iskafani: “Caín, ¿afeskakĩ mĩ exto mĩ reteamẽ? Iskaratĩa ã mia omiskõimani,” ixõ yoini. Abel nafianixakĩ aato noko nimapaketiroma,

Jesús keskarama. Akka Jesús nanixakĩ noko nimapakenaka.

<sup>25</sup> Nāskakē Niospa mato yoiai keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki ftoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakĩ finakōixii. <sup>26</sup> Akka Epa Niospa Moisés yafi nōko xinifo machi Sión anoxō ato yoikĩ āfe mekapa mai naya naya ani. Nāskaxō anā ato yoini iskafakĩ: “Anā mai fisti ē naya naya axima. Nairi ē naya naya axii,” ixō ato yoini. <sup>27</sup> Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo. <sup>28</sup> Nāskatari a Nios ika ariax mai naya naya itiroma. Nāskakē nāno nō afe isharapakexatiro. Nāskakē aōnoa nō shināsharayanā nō kīfifafāinō. Nāskaxō a noko amapaiyai keskara nō axōaino nokoki Epa Nios inima sharakōixii. <sup>29</sup> Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakĩ kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

## 13

### *Afeskaxō nō Nios inimamatiromē*

<sup>1</sup> Māfi Cristo afe yorafokĩ. Nāskakē mā ranā nōināi xateyamakāfe. <sup>2</sup> Yora fetsafori mai fetsa ariax oaito mātō pexe anoxō ifisharakāfe.

Nāskakēri tāpioxoma fetsafāfe yorayama fiano ājirifo fiano ifimisfo.

<sup>3</sup> Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato ax-osharakāfe. Nā mā ato fe karaxa mēra ika keskara shinākōikāfe.

<sup>4</sup> Feronāfakefo, mātō āfifo fe nōināsharakāfe. Nāskax isharakāfe. Askatari mātō āfima fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfima fe ikaifono, kērofori āto fenema fe ikaifono, nāskarafo Niospa ato omiskōimaxii.

<sup>5</sup> Akka kori ichapa noiyamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini. <sup>6</sup> Nāskakē chanīmakōi nō yoitiro iskafakī:

Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

<sup>7</sup> Niospa meka yoimisfāfe mato yoinifo keskara atoōnoa shināfafāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

<sup>8</sup> Akka Jesucristo nā ipaoni keskara ĩpanaka. Anākai iskaratīa fetsatiroma. <sup>9</sup> Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani

kiki. Akka a nõ piaitokai nõko shinã mēra noko shinãmasharatiroma. Askatamaroko Niospa noko noixõ noko imasharatiro a keskara shara nõ inõ.

<sup>10</sup> Nãskakē nõ chanĩmara famis Jesucristo ifi cruz ikakinoax noko nãxoni nõko chaka noko soaxoxiki. Akka Jesucristo chanĩmara fatama nã Moisés ato yoini keskara fisti chanĩmara famisfo. Nãskakē afãfekai ato chaka soaxotirofoma.

<sup>11</sup> Akka nã Moisés ato yoini keskai a ato Nios kĩfixomis xanĩfo fisti, ares fisti pexe kene fetsa mēra ikipaoni, nã mēra yoinã ina imiya ikikē õikĩ Epa Niospa ato chaka soaxonõ. Akka nã yoinãfãfe ato kaya pexe rasi pasotaixõ koofapaonifo.

<sup>12</sup> Nãskarifiã Jesús Jerusalén pasotainoax noko omiskõixokĩ ãfe imi foax noko nãxoni nõko chaka noko soaxoxiki a keskara shara nõ inõ. <sup>13</sup> Akka nõri Jesús ipaoni keskara inõkãfe a nõ ipaoni keskara anã ixikima. Nãskaxõ ãfe kaifãfe potanifo keskafakĩ nokori nofe yorafãfe potatirofo. Nãskakaxõ Jesús ìchaketsanifo keskafakĩ nokori aõxõ ìchatirofo. Akka Jesúsnoa chaka shinãmisfo keskafakĩ nokori aõxõ chakafatirofo. <sup>14</sup> Nono mai anoax nõ omiskõifikĩ nõ shinãchakaima, mã nõmãi tãpiãx nono mai ano nõ ipanakama. Askatari mã nõ tãpia a Nios ika ari nokoax nõ afe ipanaka. Nãskakē nã nõ manasharamis.

<sup>15</sup> Jesús noko nãxonioxõ nõ Epa Nios aicho fai. Akka nõ yoikĩ iskafatiro: “Aicho Epa Niosi, mã Fake Jesús ãfe Ifokõi. Aõxõ ãfe mia aicho fai,” ixõ nõ yoitiro. <sup>16</sup> Askatari ato shinãmakiyamakãfe mã afarayaxõ a afaamaisfo ato inãsharakãfe. Mã ato askafaito õikĩ Nios matoki inimasharakõi kiki.

<sup>17</sup> Akka nã ichanãti pexe anoxõ Niospa meka mato yoimisfo ato nikasharakõifafãikãfe. Nãskax

nã mato yoiainfo keskakõikãfe. Nãfãfe mato kexesharamisfo mã Jesús nikasharanõ. Akka nãfãferi tãpiafo Nios ari nokoafãfe ato yõkaxii iskafakĩ: “¿Mã ãfe meka mã ato tãpimasharamismẽ?” ixõ ato yõkaxii. Nãskakẽ ato nikasharakãfe inimakõinõfo. Akka mã ato nikayamaino inimatirofoma, shinãchakatirofo. Nãskaxõ mato axosharatiroma.

<sup>18</sup> Nokori Epa Nios kĩfixokãfe. Epa Niospa noko amapayai keskara mã nõ apaimiski. Nãskaxõ nõko shinã mëraxõ nõ afaa chaka shinãima. Nõ isharaaikõi. <sup>19</sup> Eari Nios kĩfixokãfe matoki ea samama nĩchinõ ã anã mato fe inõ.

*Ato Nios kĩfixoyanã mã mekai xatekĩ ato yoini*

<sup>20-21</sup> Epa Niospa noko inimamakõimis nõ afaa shinãchakanõma. Nõko Ifo Jesús mã nokoõnoax nafiakẽ Apa Niospa otofani Jesús keyokõi finõax noko kexemis inõ. Jesús noko nãxonionõax Epa Nios fe nõ afe yora ipanaka. Nãskakẽ mã afara shara yopaito Epa Niospa mato inãtiro a mato apayai keskara shara mã anõ. Æfe Fake Jesu-cristoõxõ nõko shinã mẽra noko shinãmasharax nokoki inimakõixii. Nãskakẽ keyokõichi Jesúsnoa nõ yoisharapakenaka. Nãskara sharakõi ipanaka.

<sup>22</sup> Efe yora mĩshtichi, nã ã mato ichapama yoi keskara nikasharakãfe fena fenakãkima. Nã ã mato kenexona keskai mãto shinã mẽra mato shinãmasharaxii kiki. <sup>23</sup> Ë mato yoipai mã nofe yorashta Timoteo iskaratĩa karaxa mëranoax mã tsekea. Akka samamashta ekeki oano ã afe kai mato ari.

<sup>24</sup> Keyokõi ichanãkaxõ a mato Niospa meka yoixomisfo yafi a mato kexemisfori nõ ato

yoisharai. Akka nono Italia anoxori nã Nios Ifofaafãferi mato yoisharakani.

<sup>25</sup> Epa Niospa keyokõi mato noikĩ mato shara faxõfafãinõ. Nã tii.



**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 22 Feb 2024 from source files  
dated 29 Jan 2022

6c7b7ce2-9d87-5405-91e6-71ce1387adcc